

元明事類鈔

欽定四庫全書

元明事類鈔卷十

監察御史姚之駟撰

官品門三

總督

總制軍務 列卿記成化時滿四亂始命都御史項忠
總督固原等處軍務後王越總制陝西馬文升節制
三邊然皆未有專職宏治時部議三邊宜得重臣專

任開府乃起王越為之又命秦紘總制軍務遂為定規至嘉靖時避制字改為總督

攜二僮 名臣錄劉大夏總督兩廣勅使臨門即攜二僮以行兩廣人士聞其來如饑兒之得乳母

築邊牆 獻徵錄翁萬達總督宣大偏保軍務議築邊牆東自老營堡西距滑石澗延袤幾二萬丈于是自居庸以臨三鎮室家無虞行旅絡繹皆築垣守要之力也

旌廬杜餽 海瑞集郭襄靖應聘總制兩粵輿故苦奉
大吏將領不暇扞圍日計剝取軍餉時遂有東山
之變公至未言討賊先下令旌廬杜餽吏民惶恐東
山叛卒爭丐降矣

民為立祠 名臣錄秦紘總制三邊造兵車置火器修
城堡闕隘一萬四千餘處邊功孔多既去民為立祠
祀焉

上疏手書 湧幢小品胡宗憲總督浙江先後上疏皆手

書如一蓋不獨有禦倭之功其一段敬謹心亦自難及

約和市 列卿記石茂華總督陝西時雲中和市初成
公與為期約不使越額後秦隴大饑日夜露禱為民
請命天果大雨

仍欲用論 獻徵錄許論為薊遼總督有功入為尚書
敵掠灤西上曰朕仍欲用許論論至鎮敵伺大水峪
論登陴誓諸軍力戰而却之

撫蠻得宜 列卿記王翱威望素著總督兩廣蠻人聞
其至大懼翱曰蠻人久反要在撫化得宜耳引其酋
長犒以金帛酒食多見歸順

封威寧 名臣錄王越成化時總督三邊出延綏斬敵
搜河套奪其馬牛羊器械無算又出大同破威寧海
遂封威寧伯

設險除器 泳化編劉天和總制三邊設重險以衛內
除戎器以備外于是有乾溝澗諸女牆濠塹之設又

制為有脚輕車強弩諸火器短兵之制

平奢安

明紀事本末崇禎時起朱熨元仍總督貴湖

雲川廣五省軍務熨元再涖黔乃檄滇兵下烏撒蜀
兵出永寧卑節而親帥大軍駐陸廣八月奢崇明安
邦彥俱授首焉明史熨元長八尺腹大十圍飲噉
魚二十人治事明果使人各當其材

盡撤防兵

名世類苑嘉靖中王守仁總制廣西等四

省軍務時土官作亂守仁至南寧盡撤防守之兵於

是思田二州頭目悉領其衆移境來歸

屹然巨障 明謝純集正德改元命楊公一清總制全
陝兼督馬政公以寧夏花馬池要害地宜修濬墻塹
以固邊防乃興工築邊牆刻期奏績時劉瑾憾公公
乞休僅築四十餘里至今屹然巨障

諳達封貢 澹園集王襄毅崇古總督宣大諳達數入
塞叛人趙全輩實傳翼之諳達孫扣關請降厚遇之
以購全等竟執全以獻因議封諳達為順義王歲貢

馬五百有九

方王 明史藁萬厯時方逢時起故官總督宣大山西
軍務始逢時與王崇古共決大計貢市之議崇古獨
成之逢時復代崇古申明約信兩人首尾共濟邊境
遂安人稱方王云

巡邊供具 玉堂叢話何元郎云王晉溪總制三邊時
每一巡邊雖打中伙亦費百金未嘗折乾到處俱要
供具燒羊亦數頭不數鬻盡撤去散與從官雖衆頭

目亦皆沾及西北一有警則人人效命

墮淚碑 明紀事本末荆襄流賊叛命項忠總督軍務
討平之忠多濫殺既樹平荆襄碑或亦呼為墮淚以
嘲焉

聽節制 泳化編總督軍務自總兵下悉聽節制蓋自
靖遠伯王驥麓川之役始

元樞上畧 明馮鐸賀總督啟帝眷元樞國資上畧自
天子所出宣南仲之威以我公歸八領北軍之重

總河

河平圖 元史順帝時河決命賈魯以工部尚書總治
河防功成帝遣使報祭河伯召魯還朝以河平圖獻
詳見河

宋陳功 明紀事本末凡漕渠在齊魯間者宋禮功為
多在江淮間者陳瑄功為多

總河專官 明馬從聘疏歷朝命大臣出總漕運兼理
河渠河漕原未分設間值河有他故亦旋設旋罷而

總河專官則自尚書潘季馴始

橈櫓治河 王世貞集劉尚書天和總理河道時河驟
南徙歷濟而徐皆旁溢公晨夜改舟車為橈櫓探求
盡得其利便疏汴以殺其下流疏七十二泉以濬其
上流不淹時而河工就

治張秋 永化編孝宗時命劉大夏為僉都御史治張
秋決河大夏浚河築堤五旬而事竣費輕功重逾于
徐有貞云

得龍首 明通紀萬厯時潘季馴總理河漕築高家堰

塞崔鎮東河淮正流使並趨入海三年而堰成一夕

黃浦涸得龍首以獻其大專車時以比龍首渠云

禱神潮湧 名臣記喬穀以工部侍郎治漕河時亢旱

水淺舟膠公齋沐禱于江海之神江潮湧入漕河運

船遂通

事不中制 明紀事本末景泰時河決兗州濟汶諸水

皆從之入海會通河遂淤上命徐有貞治之有貞言

治河必先疏上流水勢平乃治決決止乃濬淤多為
之方以時節宣時工部請如有貞言不中制以是得
有功蓋三年而告成

四治河 潘季馴河防一覽河性湍悍善徙者水漫而
沙壅也法莫若以隄束水以水攻沙循河故道束而
湍之使水疾沙刷無留行而又近為縷隄縷隄之外
復為遙隄則水益淺遠不至旁決蓋季馴凡四治河
河皆治云

開淤避險 明史葉李化龍總理河道與巡撫李三才
奏開淤河由直河入加口抵夏鎮二百六十里避黃
河呂梁之險

禮官新祀 邵寶詩我有辦香何所致禮官新祀宋司空
按明工部尚書宋禮與平江伯陳瑄俱治會通河漕
運賴之建祠世祀于南旺

詔領河隄 陳子龍送人擢河道少司空詩舊京開府
靜牙璋詔領河隄入未央

總漕

始置督漕 續通考景泰二年始置欽差總督漕運都御史一員駐淮安府

從河運 明紀事本末永樂十三年罷海運糧命平江伯陳瑄于湖廣江西造平底淺船三千艘以從河運
歲運三百餘萬石

歲運不稽 明張燦集李裕于憲宗時總督漕運時法久弊生皆起于軍官掊克文允違期閘河阻淺之故

公別具弊而更之歲運不措漕卒亦樂于趨事

疏河固隄 明書馬卿以副都御史督漕會漕塞議者
紛紛言復海運開濟汝卿曰令六月無漕者京師困
矣他豈及救哉盍姑紓目前急乎仍疏河而固隄水
無泛洩漕旋通

奏留漕米 列卿記張縉宏治中總督漕運兼巡撫造
舟之價必預給漕卒必選精壯者淮揚饑奏留漕米
萬石全活之